

Mercatum huic loco obtinuit. Inde quamvis *VVaveney* sit oppidis redimitus, ex illis tamen ne unum quidem vetustatis nomine gloriatur, nisi *Shelton* quod remotius est & antiquæ imprimis *Sheltonorum* familiæ nomen impertiit: sed priusquam mare accedat, *GARIENI* flumini se admiscet, qui Britannis *Guerne*, Anglis *Gerne*, & *Iere*, ab alnis proculdubio sic Britannie dictis, quibus obumbratur. E medio hujus regionis emergit, non procul à *Gernston* viculo, quem denominavit, vicinumque habet *Hengham*, qui suos Barones de *Rhia* etiam dictos habuit, à Ioanne Marefcallo (nepote Guilielmi Marefcalli Comitis Penbrochiæ ex fratre) oriundos, cui Rex Ioannes terras Hugonis de *Gornaco* proditoris cum filia & cohærede Huberti Domini de *Rhia* contulit. A Marefcallis vero ad *Morleios*, & ab illis per *Lovellum* ad *Parkeros* nunc Dominos de *Morley* temporis vicissitudine transmigravit. *Skulton*, aliter *Burdos* dictum, parum hinc abest, quod eo jure tenebatur, ut Dominus in coronatione Regum Angliæ primarius esset, quem vocant *Lardiner*. Magisque ad Orientem *VVimundham* conspicitur, nunc contraîte *VVindham*, sepultura *Albineorum*, qui Comites *Arundellia*, clarum, quorum progenitor Guilielmus de *Albineio* Pincerna Regis Henrici Primi ecclesiam hic posuit, & Monasterio S. Albani in cellam dedit. In cujus sacra turri, quæ celsa surgit, Guilielmus *Kett*, altera fax *Norfolciensium* furorum, anno *M D X L I X* sublimi suspensus. Nec hic silendum, quod ad quantum milliare abest *Attilborough* antiquæ familiæ *Mortumariorum* sedes, qui alii ab illis de *Wigmor*, aureum clypeum liliis nigris inspersum gesserunt, & Collegiatam ecclesiam hic fundarunt, quæ jam disparuit. Horum hæreditas per matrimonium *Ratcliffis* nunc *Sussexiæ* Comitibus, familiæ de *Fitz-Ranulph*, & Radulpho *Bigot* quondam accrevit. Sed ad flumen revertamur.

Garienis autem ille non longum in Subsolanum cursum tenuit, cum *VVensum* rivulum (alii *VVentfar* vocant) ab Austro aquas suas infundat: ad quem prope fontes vallum est quadratum ad *Taiesborough*, quod continet acras *xxiv*. Romanorum videatur castrametatio, si non sit illud quod in antiqua Tabula Chorographica à M. Welfero edita *AD TAVM* dicatur. Superius ad eundem *VENTA ICENORVM* florentissima hujus populi olim urbecula sedet, sed nunc vetusto nomine amisso, *Caster* appellatur. Nec mirum ex tribus Britanniæ *Ventis* hanc solum nomen amisisse, cum se penitus amiserit. Præter parietinas enim quæ suo ambitu quadrato *xxx* plus minus jugera complectuntur, & habitati soli indicia, pauculosque Romanorum nummos jubinde fossoribus se exhibentes, nihil superest. Verum ex hac posterioribus sæculis ortum habuit *Norwicus*, ad tertium hinc lapidem, prope *Garienis* & alterius fluvii anonymi (*Baridenum* alii qui vocant) confluentes, qui longo decursu recurrentibus sæpe ripis fluxuosus hac *Garienem* per *Attilbridge* petit, & ad Boream *Horsford* relinquit, ubi vebridus & dumis sepultum jacet castrum Guilielmi de *Casneto*, sive *Cheney*, qui regnante Henrico Secundo, inter Angliæ proceres imprimis floruit.

NORWICVS ista urbs celeberrima, nobis *Norwich*, Saxonice *Norþwic*, id est, *Sinus Aquilonaris*, si *VVic* Saxonice fluminis sinum significet, ut docet Rhenanus: hoc enim loco sinuoso anfractu devolvitur flumen: vel *Statio Aquilonaris*, si *VVic* ut contendit Hadrianus Iunius, stationem securam, ubi conjunctioribus ædificiis habitatur, denotet; vel castellum Septentrionale, si *VVic*, castellum sonet, ut Alfricus noster Saxo affirmavit. Si vero *Norwic* à *Venta* deflexum cum quibusdam opinarer, quid aliud quam à veritate ipse me deflecterem? Nec enim alio jure sibi *VENTÆ* nomen arrogare potest, quam vel *Basilea* *AVGVSTÆ*, vel *Baldach* *BABYLONIÆ*; ut hæc etenim è *Babyloniæ*, illa ex *Augustæ* occasu exorta: ita *Norwicus* noster è *Venta* illa antiqua sero emicuit; quod Britannicum ejus nomen apud authores *Caer Guntum* probat, in quo, ut in *VVentsum* sive *VVentfar* flu. *Venta* nomen se planissime prodit. Nec enim hoc vocabulum *Norwich*, ante bella Danica uspiam nostra legentibus sese offert. Tantum abest, ut vel *Cæsar*, vel *Guatelinus* Britannus condiderit, quod fabulantur illi, qui omnia creduli amplectuntur, iudicii trutina nihil pensant. Verumenimvero nunc suis opibus, frequentia, ædificiorum elegantia, templorum pulchritudine, & numero (*Parœcias* enim plus minus *xxx* complectitur) civium sedulitate, in principem fide, in externos humanitate, inter celeberrimas Britanniæ urbes merito connumeranda. Ab *Æquatore* *LII* partibus, *XL* scrupulis, à *Fortunatis* insulis *xxiiii* partibus *LV* scrup. peramœno situ in collis dejectu sedet, forma oblongiori, à meridie in Septentrionem mille quingentos passus protenta, latitudine autem dimidio minore, ad Meridiem se sensim quasi in conum contrahente. Mœnibus validis (in quibus crebræ dispositæ turres, & undecim portæ) undique obseptæ, nisi ad Ortum qua flumen (cum sinuoso flexu quatuor pontibus pervium Septentrionalem urbis partem interluerit) profundo alveo, & præcipitibus ripis defendit. In ipsa hujus urbis quasi infantia, cum *Etheldredus* vir mentis & consilii inops regnaret, *Sueno* *Danus*, qui Angliam magnis copiis pervasit, primum diripuit, & postea injecto igne succendit. Revixit tamen, & ut in libro quo Angliæ lustrum condidit Guilielmus Primus tempore *Edwardi Confessoris*, *MCCCXX* *Burgenses* in ea numerabantur. Quo tempore, ut ex eodem libro loquar, reddebat *xx* libras Regi, & Comiti *x* libras, & præter hæc *xx* solidos, & *iiii* præbendarios, & *vi* sextarios mellis, & *ursum*, & *sex* canes ad *ursum*: modo vero reddit *Lxx* libras pensas Regi, & centum solidos de *Gersuma* Regina, & *asturconem*, & *xx* libras *blancas* Comiti, & *xx* solidos de *Gersuma* ad numerum. Regnante autem Guilielmo illo, funestæ seditionis flamma, quam Radulphus *Eastanglia* Comes in regem accenderat, hic adhæsit. Cum enim ille fuga sibi consulisset, uxor cum Britonibus *Armoricanis* hoc in loco gravissimam usque ad extremam famem obsidionem sustinuit, quæ tamen eo demum adacta, ut solum verteret, & ita accisa hæc urbs ut vix *DLX* *Burgenses* relinquerentur, ut in illo Censuali libro legimus. De hac deditione meminit in sua ad Guilielmum Regem

Shelton.
Garienis
fl.

Barones
de Rhia,
vel Hen-
gham.

Windham.

Attilbo-
rough.
Mortuo-
marii.

Venta Ice-
norum.
Caster.

Horsford.

Norwich.

Wic quid
Saxoni-
bus signi-
ficavit.

Augusta
Rauraco-
rum.